

15/10/1999

Ragam artis kurang sopan

Azzagb

ANDAİKATA kita melihat pula penampilan artis, sebenarnya sebilangan artis wanita Malaysia telah lama mengagungkan imej seksi dan kerap pula beraksi ghairah, baik dalam filem mahupun di dada majalah hiburan.

Tanpa segan silu mereka mendedahkan bahagian tertentu badan atau setidak-tidaknya berpakaian nipis dan sendat, tidak ubah seperti apa yang dilakukan oleh artis Barat. Ada di kalangan mereka bangga memberi `pos istimewa' yang menampakkan lurah buah dada atau bergaya dengan hanya berpakaian mandi untuk hiasan majalah hiburan.

Ditinjau secara teliti, ramai daripada mereka ini berbuat demikian semata-mata untuk meraih populariti tanpa mempedulikan harga diri dan batasan agama serta kesan buruknya terhadap sosial remaja. Apabila ada wartawan hiburan yang mengajukan soalan berkaitan hal itu, jawapan yang biasa kita dengar antaranya, "saya cuma bergambar untuk majalah" atau "itu sekadar lakonan semata-mata".

Demikian betapa artis kita memandang remeh implikasi di sebalik penampilan panas mereka selama ini yang secara langsung sebenarnya telah memalukan umat Islam secara keseluruhannya. Akibat tindakan itu juga kalangan remaja Melayu kini seolah berasa bagai suatu kebiasaan apabila sesetengah daripada mereka turut selesa berimejkan sedemikian.

Kalau begitu tingkah laku artis Melayu, maka status role model yang seringkali dikaitkan dengan mereka, nyata tidak layak diperakui oleh masyarakat yang menyanjung tinggi budaya ketimuran. Dalam soal sebegini pastinya kita amat mengharapkan pihak berkuasa memainkan peranan penting ke arah membentuk kembali personaliti artis agar lebih sopan pada pandangan mata masyarakat, terutamanya umat Islam dan menjernihkan semula permasalahan moral remaja.

Paling penting adalah kesedaran artis itu sendiri untuk berubah demi maruah diri dan keluarga mereka kalau tidakpun demi kebaikan anak muda yang memandang mereka sebagai idola, baik dari segi penampilan atau tingkah laku.

Begitu juga dengan penerbit majalah hiburan dan filem, mereka perlu lebih bertanggungjawab memastikan adat dan batasan agama tetap dihormati. Masing-masing turut berperanan ke arah pembentukan keperibadian tinggi pembaca atau penonton hasil produk penerbitan mereka.

Sesuatu yang harus kita renungi bersama, betapa Wawasan 2020 yang diutarakan oleh Perdana Menteri, Datuk Seri Dr Mahathir Mohamad menuntut usaha kita semua ke arah melahirkan masyarakat bermoral tinggi, maka kitalah yang bertanggungjawab untuk menjayakannya.

Sebagai renungan bersama, artis atau siapa saja yang terbabit dalam dunia hiburan, wajar menyematkan dalam diri pesanan daripada Imam Al-Ghazali yang antara lainnya berbunyi;

Janganlah membiarkan dia (anak muda) melihat sesuatu daripadamu (orang yang lebih tua) melainkan yang baik. Dan janganlah membiarkan dia melihat sesuatu daripadamu melainkan yang cantik belaka."